

Ebe onuzi-eva ni iPo^{lu} o kẹkẹ ghi egbo IKoritia Eni e miesuo

¹ Mhẹmhẹ iPo^{lu}, aghiusomhi na kẹkẹ oyi iJesu iKirisiti ni Ẹshinẹgba o zẹ abi o ghọle ọli shi mhi khi, li shi inyoghuo awa iTimoti. Mhẹmhẹ mhi kẹkẹ ebe ona ghi igbaa oyi eni e mie iJesu iKirisiti suo onayi Ẹshinẹgba ni e la ẹoli iKoriti ali eni a pfa na nya ni e la eke Akhaya.*

² Mhi lema Ẹshinẹgba ita awa ali iJesu iKirisiti Onomhwe e ka li okhale na ẹ, e ri ofomhẹ na ẹ.

Ẹshinẹgba ona irudushi nya

³ Awa kueghie Ẹshinẹgba, ni o khi ita iJesu iKirisiti Onomhwe oyawa, loli o khi ita ona ilelemhi, ni o khi Ẹshinẹgba na irudusho nya.

⁴ Loli o ri udu ẹ shi awa o ini awa la osoli khi osoli, ni awa li dobe ri udu shi eni e la osoli o, ikhi irudusho onabi Ẹshinẹgba o ro shi awa o.

⁵ Itobo khi awa li nu iKirisiti me osoli ebubu eyoli, awa li ya rote obọ oyi iKirisiti kemhi irudusho oyi Ẹshinẹgba ni o gbeku o.

⁶ Anye kha me osoli, ni a ro mholi irudusho ali imiepfuese lo. Okekha khi eri a ri udu shi anye o, ẹẹ a ri udu shi o, ni o re ẹ mholi irabomudu ri egbe mie osoli onabi anye li ri egbe mie.

* **1:1** Li zẹ Ika 18.1

⁷ Iregbenga ni anye regbenga ẹ, o kie migha, itobọ khi anye lẹsẹ khi abi a li nu anye mẹ osoli eyi anye, ighọ a li nu anye mhọli okemhi shi irudushọ oyanye.

⁸ Inyoghuo, anye ẹ nono ni a lẹsẹ osoli ni anye mẹ obini Esha. Eri anye mẹ ukpokpomhi ọmunu ni o nẹ anye abọ. Ni o khia khi eri anye ke khẹna egbe anye eghuli ukhomhi.†

⁹ Eri anye she ri ọli shi udu khi eni eghuli o mema ke ya gbe anye ke khi. Eri a mẹ ona ini anye khi regbenga egbe anye, sẹ ni Ẹshinegba tse ni ọọ guise ọni ọ ghu-a le.

¹⁰ Lọli ọ rue anye okhẹna eghuli ukhomhi le, ọ ya rue awa ọ le. Lọli awa ri udu nga khi ọ ya gbo rue awa ọ le.

¹¹ A li ri iromhi ke kpaghiẹ anye obọ, ini ebubu ẹgbọ e mẹ asha ri itobọ oyanye kphẹmhi na Ẹshinegba, ọni ọ pfo udu ri iromhi ni ebubu ẹgbọ e sọ a tse.

IPọlu ọ mu ugbamhi eyọli pfi

¹² Anye ma tono obọ udu shi ọ, udu oyi anye ni ọọ gue anye ẹzọ o gbo pfi ọtsele shi ọ, khi, angeli oyanye elemhi agbọ ona ali angeli ni anye nu ẹ ngeli, khi ikhueghie elemhi-a ali igesikia oyi Ẹshinegba o ri anye ẹ gbe akanya. Ọa khi ilẹsingme agbọ anye te riele ona, ama okhale oyi Ẹshinegba a rọ riele ọli.

¹³⁻¹⁴ Emini a dobe ya ze, ni o ya gbo lo ẹ esọ anye keke ghi ẹ. O kha rie khia khi emini anye ẹ ngme ọa lẹ ẹ esọ pfo ne, anye mhọli ọ shi udu khi o ya lo ẹ esọ pfo nya elelese, ni a ri anye ke tono obọ udu,

† 1:8 Li ze 1 iKori 15.32

abi anye li rẹ ẹ ya ke tono obọ udu, ogbẹlẹ oyi iJesu Onomhuae oyawa.

¹⁵ Itobọ khi mhi aa mhọli akhọkhọmhẹ shi ona, mhi rọ nono ni mhi kpẹ bhale ya bino ẹ, ni a mhọli ikhivọsẹ asha eva.

¹⁶ Mhi she gba li khi mhi bhale ya bino ẹ ini mhia lẹ iMasidonia ali ini mhia jele, ni mhi mẹ asha mie ẹ ikpaghọ rọ ye eke iJudia.‡

¹⁷ Eri a dabi khi mhia dobe ya liẹ khi emini mhi ya riẹlẹ na, ni mhi riẹlẹ ọli? Abi khi eri mhi li abi ogbọ ni ọ khe, “Ii.” Ọ gbolo ẹ, “Iiye.” Ini mhi ba riẹlẹ oghuẹmhẹ oyi ogbọ?

¹⁸ Abi ungmemhi oyi Ẹshinẹgba o migha shi igesikia, ighọ emini mhi gueye ẹ ọa li khi unu eva ni ọ ri utoghuo liẹ “Ii.” Ali “Iiye.”

¹⁹ Itobọ khi iJesu iKirisiti Omi Ẹshinẹgba ni mhemhẹ ali iSivanọsi ali iTimoti anye rọ tse abọ ye ẹ, ọa khi, “Ii.” Ali “Iiye,” eghẹghẹ oghuo. Ama Ẹshinẹgba “Ii,” ọ khi.§

²⁰ Irari khi emiemini Ẹshinẹgba ọ rọ nga nya, iJesu iKirisiti ọ rẹwe nya khi, “Ii.” Irarighọ, rọte iJesu iKirisiti awa te ẹ mie “Atse.” Ni anye rọ ri ufumhi na Ẹshinẹgba.

²¹ Ama Ẹshinẹgba ọ ri anye ali ẹẹ migha elemhi iKirisiti. Lọli ọ zẹ awa.

²² Ọ she shi ọlẹlẹ oyọli shi awa egbe. Ọ ri Ayẹmhẹ-nọ-pfuasẹ shi awa udu abi ọlẹlẹ ni ọ khi iyóbọ shi emini Ẹshinẹgba ọ ya riẹlẹ na awa.

²³ Ama mhi zẹ Ẹshinẹgba ọtsẹlẹ, lọli ọ lẹsẹ udu oyẹmhẹ. Itobọ khi mhi aa nono ni mhi ri elemhi ibibi nu ẹ ngme, lọli mhi aa rọ ke ye iKoriti.

‡ 1:16 Li zẹ Ika 19.21 § 1:19 Li zẹ Ika 18.5

²⁴ Oa khi eri anye ri ekpabọ gueye ẹ emini a ya miesuo. Anye lese khi a migha gbagbagba shi irudunga. Itobọ ni a mholi oghẹle anye rọ nu ẹ gbe akanya.

2

¹ Lọli o ze ni mhi rọọ khi, mhi aa ke gbo ya bhale deba ẹ, ini mhi khi yese ẹ udu-a.

² Ini mhi yese ẹ udu-a, oghuo ọ la akaghọ ni ọ ya ri egbe mu ẹ. Sẹ ni ọni ogbọ ni mhi yese udu-a.

³ Lọli o ze ni mhi rọ keke ebe oghọ ghi ẹ, itobọ khi mhi aa nono ni mhi bhale ya mẹ iyese-udu-a obọ eyi eni e kha remhe ghele. Irari khi mhi lese khi ini mhia ghele eghẹghẹ aghọ, ẹẹ a lie ke ghele.

⁴ Elemhi ukpokpomhi osoli ali amẹ evie mhi te ẹ keke ebe ona ghi ẹ, ọa khi eri mhi ẹ ni udu o ba yese ẹ-a, ama ni a rọ lese abi mhi nono ingme oye nya ramhi.

⁵ Ama ini ogbokhoghuo ọ pfi iyese udu-a, ọa khi mhemhe ọ mema lolo yese udu-a, ama ẹẹ nya ọ rọte opfoghuo yese udu-a. Ama khi, mhia nono ni mhi ngme ọli ze dose ana.

⁶ Osoli ni ebubu ẹ e lama shi a na ogbọ ọnana, e bu.

⁷ Ama a rọ topfa li a gbo ri udu shi ọli ọ, ini ọ khi yese udu-a dose ode, ni o te ya pfanọ ku ọli alo.

⁸ Mhi lema ẹ, a ze ni ọ lese khi egbegbo a nono ingme oyoli.

⁹ Eri mhi mu ẹ fe bino ni mẹ ini a ri ungmehi oyemhe ya gbe akanya.

¹⁰ Ini a rọ topfa ogbokhoghuo shi emini ọ riefe, mhemhe mhi li rọ topfa li. Ini o khia khi mhi mhue

emini mhi kha rọ topfa, mhi she rọ topfa. IKirisiti ọ khi ọtsẹle ọyemhẹ khi mhi she rọ topfa.

¹¹ Eghẹghẹ aghọ, ọkphaghie ọa mẹ ashikhoghuo regbenga dobe mu awa ọ ya le, itobọ khi awa aa khi eni ẹa lẹse igbamhi eyi ọkphaghie.

Egbe akanya ena ishobọ onogbo

¹² Abi mhi rọ bhale iTiroasi ya gue usomhi onete oyi iKirisiti le, mhi mẹ ọli khi Eshinegba ọ khueghie ode-a na mẹ shi akanya oyọli, shi oobọ.

¹³ Udu oyemhẹ ọa sheshe, itobọ khi mhi aa mẹ iTatọsi oobọ. Ighọ mhi tse egbo ena obọ okhila, mhi ya je iMasidonia.*

¹⁴ Ama, awa kuẹghie Eshinegba. Lọli ọ zẹ ni iKirisiti ọ rọ ri awa la orọlọ ni a la mie obọ abi eni e mu ọ le. Ọ ri awa ri ilẹse oyi iKirisiti ẹ gbhiaku asha kpa abi ikphela.

¹⁵ Eshinegba ọ she ri awa mele ighiusomhi eyọli-a, ni awa ba ri usomhi onete oyọli gbhiaku asha kpa, abi ikphela oyi ituale ni ọọ pfie o liẹ gbhiaku, ni o lo iteva egbo eni a mie ẹ pfuese ali eni ẹ nono ni wẹwẹ e pfua.

¹⁶ Uwemhi úgbọ oyi eghuli, usomhi oyawa ona o khi shi eni e ya pfua, ama upfiemhi oyi agbo o khi shi eni a mie ẹ pfuese ọ. Oghuo ọ dobe gbe onana?

¹⁷ Anye aa khi eni e ri ungmehi oyi Eshinegba nono ẹpfue abi egbo eghuo ẹ li. Ama ighiusomhi eyi Eshinegba ni e ri igesikia ngme ungmehi oyọli anye khi. Ekpabọ oyi iKirisiti anye rọ gue usomhi oyanye le. Eshinegba ọ khi ọtsẹle ọyanye.

* **2:13** Li zẹ Ika 20.1

3

Eni ẹẹ ga ena ishobọ onogbọ

¹ Ọa ya li abinẹ khi eri anye ke ẹ titi egbe anye mena? Anye ẹa li abi eni ẹ mie ebe ni a titi wẹ shi neni e tsabọ ungmehi ye ẹ, ali ni e kha gbolo te aghọ vu e gbo mie ẹ ebe oghoghọ olese? Anye ẹa mholi emini anye ri ebe eghoghọ ọ riẹ.

² Ẹẹ oyẹ ẹ a khi ebe oyanye ni a kẹkẹ shi ekelemhi udu oyi anye ni ẹgbọ nya e mẹ ẹẹ zẹ.

³ Eri o rọkhasẹ khi ebe ni iKirisiti lẹlighuo ọ kẹkẹ, a khi. Itobọ khi a mie itsabọ ungmehi oyanye suo. Ọa khi ọgbọ ọ ri atsu kẹkẹ ẹ shi ebe, ama Ayẹmhe oyi Ẹshinegba ọ kẹkẹ ẹ. Ọa khi ukiẹkiemhi ẹchẹ ọ kẹkẹ ẹ shi ama elemhi udu oyi ẹgbọ.*

⁴ Onana o khi iregbenga ni anye mholi na Ẹshinegba rọte obọ oyi iKirisiti.

⁵ Ọa khia khi eri anye ghọ guẹ ẹ gbe oni akanya ona, ama Ẹshinegba ọ ri iguẹgbe-akanya ona na anye.

⁶ Lọli ọ ri anye khi eguẹgbe oyi akanya igue ungmehi oyọli le, na ishobọ onogbọ, ni ọa khi oni a kẹkẹ shi ebe, ama ena elemhi Ayẹmhe. Irari khi emini a kẹkẹ shi ebe, eri o ri eghuli ẹ bhale, ama Ayẹmhe o ri agbọ a na ọgbọ.†

⁷ Ushi oyi iMosisi ni o ri eghuli bhale, ni a kẹkẹ shi ikiyeemhi echẹ, ufumhi ni o gẹ nyanyanya, ni ọọ kala, o deba bhale. Ini oni ufumhi ona ni o zẹ khi ẹgbọ iZirẹni ẹa ke dobe ẹ bino iMosisi alo ukhomhi tatata, o kala,‡

* **3:3** Li zẹ *Okiali 24.12; ijere 31.33; Ezik 11.19; 36.26* † **3:6** Li zẹ *ijere 31.31* ‡ **3:7** Li zẹ *Okiali 34.29*

⁸ Sẹẹ ufumhi oyi ikanya eyi Ayẹmhẹ ni o ri agbọ a na ọgbọ o ke bẹshi ya li?

⁹ Ini ufumhi o la ugamhi ni o ri eghuli ẹ bhale, sẹẹ ugamhi ni o ri ipfuasẹ ẹ bhale ọa li ya mhọli ufumhi oni o funẹ?

¹⁰ Itobọ ona, awa dobe ya liẹ khi emini o kpe lighọ mhọli ufumhi ni o gẹ nyanyanya ẹlẹlẹ, ọa ke mhọli ufumhi, itobọ ufumhi oyi emini o ke to-ẹoli ọli.

¹¹ Ini emini oo kala, o mhọli ufumhi, sẹẹ ufumhi ni o la oni o migha agbọagbọ ọọ liẹ fu nẹ.

¹² Itobọ khi anye mhọli oni irudushi ona anye rọ li ghọ mhọli igbeudu.

¹³ Anye ẹa li abi iMosisi ọ li, ni o ri ijejẹti ku alo ini ẹgbọ iZireni e khi mẹ abi oni ufumhi ni oo gẹ nyanyanya oghọ, ọ li i kala li alo-a. §

¹⁴ Ama eri a guese wẹ udu, irari khi ramhi amo, eri a kie ri oni ijejẹti oghọ ku wẹ alo, ini ẹẹ zẹ ebe ishobọ ona ẹlẹlẹ. Ini ọgbọ ọ rọ ghi iKirisiti ko tse, ọ rọ ọ rue ọgbọ oni ijejẹti alo-a.

¹⁵ Ighọ o kie li ogbe na amo, eri ijejẹti o kie guese wẹ udu ini ẹẹ zẹ oni Ushi oyi iMosisi.

¹⁶ Ama ini ọgbọ da mupfi bhale deba Ọnọmhue ne, ọ rue ọli oni ijejẹti ode-a.*

¹⁷ Ọnọmhue ni a ngme shi akana ena, lọli khi iKirisiti, Ayẹmhẹ oyọli ọ te ẹ gbe akanya, ali khi ashini Ayẹmhẹ oyi Ọnọmhue o da la ne, ẹpfua o la akaghọ.

¹⁸ Alo eyawa nya ni aa ri ijejẹti ku, o ri ufumhi oyi Ọnọmhue ẹ gẹ nyanyanya abi ughegbe. Oni ufumhi oghọ, obọ oyi Ọnọmhue o te bhale, ni ọ khi

§ 3:13 Li zẹ Okiali 34.33 * 3:16 Li zẹ Okiali 34.34

ɔni Ayemhe. Loli ɔ mu awa pfi ya li abi loli, rɔte ufumhi ni o rue ɛ nga ɔ.

4

Osoli ali ɔsuemhe ni e la akanya oyi iKirisiti

¹ Irarighɔ, aborɔkhia khi ilɛlemhi oyi Eshinɛgba anye rɔ mie akanya igue ungmehi le ona egɔ, loli egbe ɛa rɔ pfo anye-a.

² Eri anye ri ochoghɔ she kie angeli osheli ali omama. Anye ɛa ya ngeli angeli ikpamhika wɛkhi eri anye ɛ mu ungmehi oyi Eshinɛgba ukhomhi pfi kpɔkɛ. Ochoghɔ eri anye ri emini e khi igɛsikia khasɛ gboo, abi o khi shi ukpɛloe oyi Eshinɛgba. Onana o ri ɛgbɔ mie shi ɔ khi eni a ri egbe ɛ nga anye khi rɔte udu oyɛwɛ ni ɔɔ gue wɛ ɛzɔ.

³ A kha usomhi onete ni anye gue ɛ le sheli, eri a rɔli sheli na eni e ya pfua.

⁴ ɔkphaghiɛ ni ɔɔ mhɛɛ ɛ shi agbɔ ona, ɔ she zuse ɛgbɔ ni ɛa miesuɔ udu ini e khi mɛ ɔkpá ali ufumhi ni o la usomhi onete oyi iKirisiti, ɔni loli ali Eshinɛgba e li abeghuo tee.

⁵ Irari khi anye aa ri egbe anye tse abɔ, ama iJesu iKirisiti anye rɔ ɔ tse abɔ, khi loli ɔ khi ɔnɔmhue, ali khi eni ɛɛ ga enayɛ ɛ anye khi, irari oyi iJesu.

⁶ Ebe-no-pfuasɛ ɔɔ, “Eshinɛgba ɔ gueye ɔkpá o rɔte alo ebili gɛ lasɛle.” Mena ɔni Eshinɛgba ɔ ri ɔkpá oyoli ɛ gɛ shi elemhi udu oyanye, ni ɛɛ a rɔ lɛsɛ khi ufumhi oyɛluɛ khi, alo eyi iJesu iKirisiti a te ɛ mɛ ɔli.*

* **4:6** Li zɛ Igbae 1.3

⁷ Eri anye li abi akhe afue ni a ri oni epfue onana shi. Ona o rokhase khi ekpabo eniemhi, obọ oyi Eshinegba e te e bhale, ọa khi obọ oyanye.

⁸ Isheghuo a na anye osoli, ama ọa pfuse anye-a. Isheghuo anye mholi akhokhomhe, ama anye ẹa la okhena.

⁹ A me anye omi olimhi ama Eshinegba ọa tsua anye pfi-a. A gbe anye de eke, ama anye e ghua.

¹⁰⁻¹¹ Ogbele kpa anye ro la okhena eghuli itobo oyi iJesu. Eri onana ni anye e me egbe o li abi irokhokho eghuli ni iJesu o ghu, egheghe agho ni o ri egboi khasẹ elemhi agbo oyanye.

¹² Onana o guele khi akanya ni anye gbe e na iJesu, eri o ri anye la okhena eghuli ogbelekpaa, ama agbo onogbo o ro o na e.

¹³ Ebe-no-pfuase ọọ, “Irari khi mhi mholi irudunga mhi ro ngme.” Oni ayemhe irudunga onana, anye li ro ngme.†

¹⁴ Anye lese khi Eshinegba ni o rote eghuli guise iJesu Onomhue le bhale agbo o ya li rote eghuli guise anye le, o rue anye ali ee bhale odalo oyoli.

¹⁵ Itobo oyee a ro rie le enana nya, ni ebubu egbo e lese okhale ni Eshinegba o li, ishegho ni e ke so iromhi ikphemhi ri ufumhi na Eshinegba.

Agbo irudunga

¹⁶ Itobo onana, egbe ẹa tigbe ya pfo anye-a, ini anye ririe kuanọ-a pfo, ama ogbele kpa ekelemhi udu oyanye o ro o khi onogbo-a shi o.

¹⁷ Eri ikuku osoli ni ẹa ya tese eyi anye, e muno anye egbe e khe ufumhi na agboagbo. Loli o ze khi osoli eyi anye e li abi emhi afue shi anye o.

† 4:13 Li ze *Iwolo 116.10*

¹⁸ Emini áá me ɛloe ɛa ya la o agbɔagbɔ, ama emini aa ya me ɛloe ɛɛ la o agbɔagbɔ. Lɔli o zɛ khi anye ri udu oyanye shi emini aa ya me ɛloe.

5

Apfɛ oyawa na iloghie

¹ Anye lɛɛ khi ini idiegbe oyanye ona, na elemhi agbɔ, ni o li abi okholo, o ghua, anye mɔli idiegbe olese ni o rɔte obɔ oyi Ɛshinegba bhale. Ikhi idiegbe no ɔa ya ghu ni o la iloghie, owa ni ɔa khi abɔ a rɔ mama li.

² Memena eri anye la oni elemhi idiegbe na agbɔ ona a to ekperumɛ-a, irari khi eri ɔɔ ghɔle anye ni a kpha oni owa na iloghie sɔ anye.

³ Itobɔ khi ini a rɔli sɔ anye, anye ɛa ke ya la irumheba.

⁴ Irari khi abi anye kie li la idiegbe ona agbɔ ena, eri anye ɛ to ekperumɛ-a abi eni egbe ɛ to. Ɔa khi eri anye ɛa ke nono ni anye kɛ la oni idiegbe oyanye ona, ama eri o ghɔle anye ni a ri idiegbe na iloghie ni ɔa ya ghu ghue eghɔ sɔ anye. Ɛghɛghɛ aghɔ ni agbɔ o to idiegbe ni ɔɔ ghu luɛ elemhi imuɔle.

⁵ Ɛshinegba o ma anye shi agbɔ na agbɔagbɔ ona, lɔli o gbo ri ɔni Ayɛmɛ shi anye egbe ni o khi iyobɔ khi lɔli ya riɛɛ emini o rɔ nga na awa.

⁶ Irarighɔ, anye rɔ o mɔli igbedu ɛghɛghɛ kpa.

Anye gbo lɛɛ khi ini anye kha da la apfɛ elemhi idiegbe oyanye ne, anye ɛa ke nu Ɔnɔmhue la.

⁷ Ama irudunga o ri anye la agbɔ, ɔa khi emini anye ri ukpɛloe mɛ, o ri anye la agbɔ.

⁸ Udu oyanye o migha gbaa shi ọ, khi, oo kha ti anye ẹloe ni anye lase idiegbe oyanye ona le, ni anye nu Onomhue la apfe.

⁹ Irarigho, eri anye ro li shi udu oyanye khi anye mema ya riẹẹ emini o ghọle ọli, okekha khi anye ke la apfe elemhi idiegbe oyanye o, okekhi anye ẹa la apfe elemhi idiegbe oyanye.

¹⁰ Irari khi awa nya, awa mema bhale ya migha odalo ukpekhomhi iguezọ oyi iKirisiti, ni ogbogbo ọ ro mie ifata ni o khi oyọli, shi emini ọ riẹẹ abi ọ ro la idiegbe oyọli, shi oni o ti o, shi oni ọa ti.*

Akanya iri-egbo ali Eshinegba riẹẹ

¹¹ Irarigho, aborokhia khi anye lẹsẹ emini inulishi oyi Onomhue o khi egbo, loli anye ro roshẹka roli ẹ lo egbo esọ. Emini anye khi o ga khueghie-a shi Eshinegba ọ, anye gbo sa khi o gbo ligho khueghie-a shi udu oyẹẹ, ni ọọ gue ẹ ẹzo.

¹² Ọa khi eri anye titi egbe anye ẹ khasẹ ẹ, ama eri anye ri egheghe ẹ na ẹ ni a me asha ri anye ke gha. Egheghe agho ni a me emini a ya so egbo eni e ri emini ri ukpeloe ẹ me ẹ gha, ocho ni e kha ro ri emini e la udu, ke gha.

¹³ Ini anye ẹa ke lẹsẹ emini anye ẹ riẹẹ, irari oyi Eshinegba lo, anye kha ke lẹsẹ emini ẹẹ riẹẹ o, irari oyẹ ẹ lo.

¹⁴ Inono oyi iKirisiti o mhesẹ ẹ na anye, itobo khi anye me ọli me khi ogbo otuoghwo o ghu-a na agbo nya, irarigho eri awa li ghu pfa olamhe.

¹⁵ Eri iKirisiti ọ ghu-a na ogbokpa ini eni e la agbo e khi ke la agbo na egbe we, ama ni e ke la agbo na oni ọ ghu-a ni a gbo guise le na we.

* 5:10 Li ze iRom 14.10

¹⁶ Itobọ ighọ, rọte ana je odalo, anye ẹa ke ri ukpẹloẹ ni ẹgbọ na agbọ e rọ bino ẹgbọ ke bino ọgbọ khoghuo. Ini o ririẹ khia khi anye kpẹ lina ri ukpẹloẹ agbọ bino iKirisiti ẹghẹghẹ ni o dọsẹ, anye ẹa kẹ lighọ.

¹⁷ Irarighọ, ini ọgbọ ọ da she ku ma iKirisiti ọ ne, ọgbọ ọnọgbọ ni a lẹsẹ ma ọ ke khi, agbọ onodiọ o she dọsẹ, agbọ onogbọ ọ ke la.

¹⁸ Ẹshinegba ọ ga riẹlẹ eni emhi enana nya. Lọli ọ ri awa ni awa kpẹ khi ebe ọli nu egbeọli riẹlẹ, rọte obọ oyi iKirisiti. Ọ ri akanya na awa, awa rọ ke ri ẹgbọsẹ nu lue riẹlẹ.

¹⁹ Eri Ẹshinegba ọ ri ẹgbọ na agbọ nya nu egbọli i riẹlẹ rọte obọ oyi iKirisiti, ni o khia khi Ẹshinegba ọa ri olamhẹ mu ota sọ wẹ. Ighọ ọ she ri usomhi ni a rọ ri ẹgbọ ali Ẹshinegba a riẹlẹ nga awa obọ.

²⁰ Irarighọ eni e to ẹloli iKirisiti awa ke ri irarighọ khi, ni o rọ li abine khi eri Ẹshinegba ọ rọte unu oyawa a lema ẹgbọ. Anye lema ẹ na iKirisiti, a ka nu Ẹshinegba rọ riẹlẹ.

²¹ Eri Ẹshinegba ọ ri iKirisiti ni ọa mhọli olamhẹ mele ona olamhẹ itobọ oyawa, ẹghẹghẹ aghọ, ni awa mẹ asha rọte iKirisiti mhọli ipfuasẹ oyi Ẹshinegba.

6

¹ Abi eni wẹwẹ ali Ẹshinegba e ga a gbe akanya oghuo, anye lema ẹ, a khi zẹ ni a mie okhale oyi Ẹshinegba shi afuẹ.

² Irari khi Ẹshinegba ọọ liẹ,
 “Abi ẹghẹghẹ ni mhi rọ ya
 riẹlẹ isomhelemhi na ẹ,
 o rọ ramhi,

mhi ri esọ shi ẹ eke,
 abi ogbele imiepfuese
 oyeẹ o rọ ramhi,
 mhi kpaghiẹ ẹ obọ.”

Mhi gueye ẹ khi memena o khi ẹghẹghẹ
 isomhelemhi, amo khi ogbele imiepfuese.*

³ Anye ẹa ya pfi ọzuode shi ọgbọkhọghuo ode, ini
 ẹgbọ e khi mẹ emini ọa ti okhọghuo gue shi akanya
 oyi Ẹshinegba ni anye ẹ gbe.

⁴ Ama abi ighumha eyi Ẹshinegba ni anye khi, eri
 anye ri emini anye khi khasẹ odekhode, abi anye li
 ri egbe mie osoli ali umhamẹ ali iyese-udu-a.

⁵ A gbe anye itali, a gbo mu anye shi ọgba-
 ighumha, a la onyaghu kuale anye utse, anye gbe
 akanya agbeghua, anye mhuẹ umha-ke-lesẹ ali
 okiamhi.†

⁶ Ama anye kie la elemhi ipfuasẹ ali ilẹsẹ, ali
 irabomudu ali isomhelemhi, rọte Ayemhẹ-nọ-pfuasẹ
 ali inono ni o rọte udu igesikia lasẹle.

⁷ Anye ẹ ngme ingmemhi igesikia, ali ekpabọ oyi
 Ẹshinegba o la anye egbe ẹ gbe akanya. Akhegbe
 oyanye khi iguẹ-ngeli odalo oyi Ẹshinegba, abi
 ọkhọli-okhuẹ ọ liẹ mu itsua okhọli mhuẹ obita ali
 ọgobọ.

⁸ A ri ekpe na anye a gbo yẹghẹ anye-a, a ngme
 onete oyanye, a gbo ngme onobe oyanye. Anye
 ẹgbọ igesikia, a lu anye elo-ẹgbhuẹ,

⁹ E li anye abi eni aa lesẹ, ama a kie lesẹ anye, a
 li anye abinẹ khi eni e ghuloa anye khi, ama, a mẹ
 ọli mẹ khi anye kie la agbọ. A na anye osoli ama aa
 gbolo anye-a,

* 6:2 Li zẹ Aza 49.8 † 6:5 Li zẹ Ika 16.23

¹⁰ Anye mhòli iyese-elemhi-a, ama anye kiele e ghele, anye li abi eni ẹa mhuẹ, ama eri anye ri ebubu ẹgbọ khi eni e pfue. Anye li abi eni ẹa mhòli emhi khoghuo, ama emhikpa anye mhuẹ.

¹¹ Ẹgbọ iKòriti, anye she ri igesikia nu ẹ ngme, anye khueghie udu oyi anye-a gbodogio deba ẹ.

¹² Anye ẹa ti egbe je ukhokho inono ni anye mhòli na ẹẹ, ẹẹ tse àà ke nono anye.

¹³ Irarigho, mhi nu ẹ ngme abi eniye eyemhe, a li mhòli usamhi nabi anye sa deba ẹ na anye. A khueghie udu oye ẹ-a na anye gbodogio.

¹⁴ Khi ze ni u nu oni ọa miesuo ke rieḽe emhi kugbe. Se, igesikia ali ẹgbhòli e li guẹ la asheghuo kugbe? Elo o ku ákpá ali obili gbe?

¹⁵ Elo e ku iKirisiti ali Okphaghie? Abi elo oni ọ miesuo ali oni ọa miesuo e mhòli kugbe?

¹⁶ Ilama-kugbe onoghuo o la Owa Oyi Ẹshinegba ali ikhumhi ọ? Irari khi Owa Oyi Ẹshinegba ni ọ la ọ, awa khi, ezeze abi Ẹshinegba ọ ngme ọli khi,

“Mhi ya la we elemhi,
mhi la we iteva a kia,
mhi khi Ẹshinegba oyewe,
we we e khi ẹgbọ eyemhe.”[‡]

¹⁷ “Irarigho, a rote we iteva lasele,
ni a khi oda shi we ọ,
ali a khi ri obọ ti
emini ọa pfuase,
egheghe agho
ni mhi ti ẹ mama egbe.”

Ẹshinegba Onomhuẹ nọ funẹ nya,
ọ ngme na. §

[‡] **6:16** Li ze iLev 26.12; Ezik 37.27; 1 iKori 3.16; 6.19
Aza 52.11

§ **6:17** Li ze

18 “Mhi ya khi ita ẹ,
 ẹẹ a khi imimhẹ
 emọse ali ikpotso.”

Ẹshinegba Ọnọmhuẹ nọ funẹ nya
 ọ ngme na.*

7

1 Aborọkhia khi awa mhọli ishobọ ena, emọle
 mhẹ, awa kpe idiegbe ali ayemhẹ oyawa-a, rọte
 emini e ri ichimhi ẹ shi ọgbọ egbe ali ayemhẹ nya.
 Awa ke rọshẹka ini awa dobe ramhi irọpfuase pfo
 nya, itobọ khi awa a na ulishi Ẹshinegba.

*Igbaa oyi eni e mie iJesu iKirisiti suọ e ri egbe mu
 iPolu*

2 A khueghie udu oyẹ ẹ-a na anye. Anye
 ẹa li ọgbọkhọghuo onobe, wẹkhi eri anye yese
 ọgbọkhọghuo udu-a, uke-liẹ khi eri anye li
 ọgbọkhọghuo le.

3 Ọa khi eri mhi ngme ona rọ pfuẹchẹ ẹ-a, irari
 khi mhi kpẹ ngme ọli khi ingme oyẹ ẹ o la anye
 elemhi udu ramhi ni anye rọ ya lama nu ẹ ghua,
 okekhi ni anye rọ nu ẹ la agbọ.

4 Mhi lolo regbenga ẹ, mhi ma rẹ ẹ gha gba.
 Elemhi osoli ni anye mẹ nya, eri iridushio ali
 oghẹlẹ oyanye o vọ ọ tsuakua.

5 Irari khi abi mhi rọ lo iMasidonia le, idiegbe
 oyanye ona ọa mhọli iyemhẹa okhọghuo. Ode-khode
 a na anye osoli, eghuo e nu anye wola, ulishi o la
 anye udu.*

* 6:18 Li zẹ 2 iSam 7.14; 1 Okhẹ 17.13; Aza 43.6; iJere 31.9 * 7:5
 Li zẹ 2 iKori 2.13

⁶ Ama Eshinegba na irudusho, ni o ri udu e shi oni egbe e pfo-a o, o ri iTatosi ni o bhale ri udu ke shi anye o.

⁷ Oa khi ibhale oyoli tse o ri udu shi anye o, ama abi a li ri udu shi oli o. O gbo gueye anye abi o lie ghole e ni a me mhe, ali abi a li vie oya, ali abi ingme oyemhe o li mu e egbe. Irarigho, oghelē oyemhe o ro fu dose abi o kpe li ghue.

⁸ Ini ebe ni mhi kekē ghi e, o ri iyese-udu-a na e, oa limhe egbe abine khi emini oa ti ni mhi riēle. O kie remhe chima, mhi me khi ebe oyemhe o re e yese udu-a ukuku eghēghē.

⁹ Ama egbe e kiele mu mhe, oa khi itobo khi mhi ri udu oye e yese-a, ama itobo khi iyese-udu-a oye e o re e mu pfi. Eri a mholi iyese-udu-a abi Eshinegba o nono oli shi. Irarigho, oa li e onobe.

¹⁰ Irari khi ivie-osoli ni o ghole Eshinegba, eri o ri ogbo o mudu pfi, o roli e nono ni a mie oli pfuese. Onana oa ri ogbo ngomhi oba-a. Ama ini ogbo vie osoli abi egbo na agbo, eghuli o ro o bhale.

¹¹ A lese bino emini ivie-osoli ni o ghole Eshinegba o ro na e. Abi a li rosheka ni a rokhase khi aa mhue umhagueli. Elemhi e bi e. Aba e sha e, ni o re e yila. A gbolo nono ni a so ingme shi ode igesikia! A rokhase khi aa mholi ashini a te riēle oni ingme do-a, eghēghē kpa.

¹² Irarigho, ini mhi ririe kekē ebe ogho ghi e, oa khi irari eni e li ingme wēkhi irari eni ea li ingme. Ama eri mhi kekē ebe ona ghi e, ni a ba me abi ingme oyanye o li mu e egbe odalo oyi Eshinegba.

¹³ Enana nya e ri udu shi anye o.

Abi o li ri irudusho na anye, igho egbe ma mu anye abi anye ro me abi iTatosi o li ghele, itobo

ayemhẹ oyoli o ti nge abi eẹ nya a ri egbe mu ọli.

¹⁴ Mhi kpẹ rẹ ẹ tono obọ udu khasẹ iTatọsi, ama aa ri omama mu mhẹ. Abi emini anye gueyẹ ẹ nya e li khi igesikia, ighọ abi anye rẹẹ gha khasẹ iTatọsi o li ya khi igesikia.

¹⁵ Ighọ inono ni ọ mhọli na ẹ o li nga shi ọ, ini ọọ sato abi a li suọ esọ na li, ali abi a ri ulishi ali iguomhise-egbe mie loli.

¹⁶ O ma remhẹ ghẹlẹ gba khi eni e zẹ ri egbe ẹ nga a khi.

8

Abi eni e miesuọ e liẹ somhopfa

¹ Inyoghuo, anye ẹ nono ni a lẹsẹ afu ni Eshinegba ọ rọ na igbaa nya eyi eni e mie iJesu iKirisiti suọ ni e la eke iMasidonia.

² Eri a rọte osoli ni e mẹ mu wẹ fẹ bino, ama eri e kie ri ukpokpomhi oghẹlẹ e somhopfa, abi o riẹ khia khi ẹa mhuẹ.

³ Mhi gue ọli ẹ yẹ ẹ egbegbọ khi eri e pfue elemhi somhopfa dọsẹ ashini e mhuẹ ramhi.

⁴ E lema anye, anye kpẹkpẹ anye zẹ ni wẹwẹ e mhọli okemhi shi oghẹlẹ ni o la irikpaghiobọ na ẹgbọ eyi Eshinegba ni e la eke iJudia.*

⁵ Eri e ga riẹlẹ dọsẹ abi anye sa khi e li ya riẹlẹ. E kpẹ te ododẹ ri egbe wẹ na Onomhuẹ, neni e ke ri egbe wẹ na anye abi Eshinegba ọ nono ni e li riẹlẹ.

⁶ Irarighọ, anye rọ lema iTatọsi, ọni ọ rẹ ẹ beẹlẹ oni egbegbi akanya ona, ọ kpaghiẹ ẹ ni a ri eminete ni a gba eke le ramhi ukpẹsẹ.

* **8:4** Li zẹ iRom 15.26

⁷ Eri a guẹ ẹ riẹlẹ emhikpa dọsẹ ẹgbọsẹ nya. A toto irudunga nẹ, a guẹ ẹ ngme ẹmuẹ nẹ, a gbo lẹsẹ nẹ. A ma nono ni a rue obọ-a, a gbo nono ingme oyanye nẹ. Zobe ni u dọsẹ ọgbọkpa okpokhe ilili.

⁸ Ọa khi itoto mhi rọ mhẹsẹ ọli na ẹ ama eri mhia mhẹsẹ igesikia ni o la inono ni a mhọli bino, abi mhi li rọli ẹ khọkhọ ọmuebe ni ẹgbọsẹ e mhọli na anye.

⁹ A lẹsẹ abi okhale oyi iJesu iKirisiti Ọnọmhue ọyawa o li, khi aboriẹkhia khi ọni ọ pfue ọ khi, eri ọ ri egbe ọli mele ọna umhame-a shi itobọ oyẹ ẹ, ni ọ mẹ asha ri umhame oyọli rẹ ẹ pfue.

¹⁰ Ude ni mhi ya ye ẹ ena, ni o rọ ti ẹ egbe lọ: O ma ti ini isomhopfa ni a te eke beke aolukpe ni a rọli ramhi ukpesẹ, abi a li kpe te odode khi eni e mhọli ọghuẹmhẹ somhopfa, ni e gbo somhopfa.

¹¹ A zobe ni a pfuse oni akanya gbe pfo, ni abi o li te eke mu ẹ egbe ni a rọ somhopfa, ni a lighọ somhi oni opfa abi abọ e tẹ ẹ.

¹² Emini a mhọli ọa mu Ẹshinegba ẹloe. Emini o mu ẹloe khi abi a li mhọli ọghuẹmhẹ ni a rọte emini a mhue somhopfa, ọa khi oni aa mhue, áá bino.

¹³ Ọa khi eri mhia mie ẹgbọ eghuo itsua shi eke ni mhi rọ ri itsua na ẹgbọsẹ tsua. Ama ni a ga li abeghuo.

¹⁴ Aborọkhia khi a mhọli gbeku ọ memena egbo, o ti ni a kpaghie eni ẹa mhue obọ. Ini wẹwẹ e ke li mhue gbeku ọ ẹlẹlese, ni ẹ ẹ aa ke rọ mhọli, wẹwẹ e li kpaghie ẹ obọ, isheghọ o guẹ ti ẹ egbe abeghuo.

¹⁵ Abi a li kẹkẹ ọli shi Ebe-no-pfuase khi,

“Oni ọ ti ẹ gbili

 ọa ya tigbe mhọli gbeku ọ,
ama ọni ọ ti ikukuwẹ gbili,

emhi khoghhuo
 ọa tigbe ẹ baliku.”†

A ghie iTatọsi je iKòriti

¹⁶ Mhi kphẹmhi na Ẹshinẹgba ni ọ li ri ọmuegbe onabi mhi mhọli na ẹ, shi iTatọsi udu.

¹⁷ Irari khi ọa khi eri ọ lẹsẹ lama shi emini anye lema li ọ riẹlẹ tse, ama eri o she kpe la li udu khi lẹli ẹ bhale deba ẹ.

¹⁸ Anye li ghie inyoghhuo ọoghhuo deba li ẹ bhale. Ọgbọ ni a ga lolo mu ekpe ẹ na elemhi igbaa oyi eni e mie iJesu iKirisiti suọ nya shi akanya itsabọ usomhi onete oyi Ẹshinẹgba ọ khi.

¹⁹ Ọa khi oghọ tse, eri eni igbaa nya eyi eni e mie iJesu iKirisiti suọ, e zẹ ọli ọ deba anye kia abi anye li tsua eni isomhopfa ikpaghọ ni anye rọ ya na ẹ kia. Ikhi ikpaghiobọ ni e ya ri ikueghie ghi eva oyi ọni Ọnọmhue, ni o rọkhasẹ khi anye mhọli ọmuegbe rọọ kpaghiobọ.

²⁰ Anye ẹa nono ni ọgbọkhoghhuo ọ mẹ emhi akhọkhọmhẹ okhoghhuo gue shi abi anye li ri isomhopfa ikpaghọ okpokhe ena kia.

²¹ Emini o zẹ khi anye lina riẹlẹ ọli khi, eri anye rọshẹka ni anye rọkhasẹ khi anye gue ri eni isomhopfa ikpaghọ ena kia. Ọa khi odalo oyi Ẹshinẹgba tse ama li shi odalo oyi ẹgbọ nya.‡

²² Anye gbo li ghie inyoghhuo ọlese ma aava ena egbe ẹ ghi ẹ. Anye she mu ọli fẹ itingmingmẹ, anye mẹ ọli mẹ khi ọ ma nono ni lẹli kpaghie obọ. Eena o mema ghọle ọli ọ rọ kpaghie obọ, eena ni ọ she mẹ khi eni a ri egbe ẹ nga a khi.

† 8:15 Li zẹ Okiali 16.18 ‡ 8:21 Li zẹ Ekpi 3.4

²³ ITatōsi ɔnuzava oyemhẹ ali oni anye ga a gbe akanya kugbe ọ khi, ama inyoghwo awa enekpọle, etoeloli igbaa nya eyi eni e mie iJesu iKirisiti suo, ni e ri ufumhi na iKirisiti.

²⁴ Irarigho, a ri inono oyee khasẹ eni egbo ena, ali emini o ze ni anye ro reẹ a gha, ni igbaa eyi eni e mie iJesu iKirisiti suo e me ọli.

9

Ikpaghiobo ni a ro na egbo eyi Eshinegba

¹ Mhi aa kha ke gbo keke ingme ikpaghiobo ni a nono ni a ro na egbo eyi Eshinegba ni e la eke iJudia shi ebe ghi ẹ.

² Mhi lese khi ọọ ghole ẹ ni a ro kpaghie obo, mhi gbo roli reẹ ẹ neta omose khasẹ egbo na obini iMasidonia, khi aolukpe, ẹẹ ni a la Akhaya a te muegbe ni a ro ya kpaghie obo, ali khi omuegbe oyee o she li guise egbo eghuo le, ni e ro li riefe ikpaghiobo.

³ Ama eri mhi ghi inyoghwo awa ena ghi ẹ ni a ro mu egbe shi eke, ini eta omose ni anye re ẹ na shi isomhopfa ni a somhi, o khi li abi afue ni anye re ẹ na eta omose, ama ni o kie khi abi anye ẹ khi a li.

⁴ Irari khi ini onge iMasidonia okhoghuo o deba mhe bhale, ni aa ro mu egbe shi eke, omama o ya mu anye shi abi anye li ligho beshi regbenga ẹ re neta omose. Eẹ omama o ya mu ne.

⁵ Lolli o ze ni mhi ro ghie eni inyoghwo awa ena ralo na mhe, ni e ya muegbe isomhopfa okpokhe oyi ukpago, ni e khi a ya ro bhale shi eke neni mhi bhale. Egheghe agho ni a ro khasẹ khi eri o pfo ẹ udu li oni okpokhe ni ọa khi oyi ichiobo.

⁶ A sato khi ọni ọ chi-obọ ri emhi kọ khi ukukuọ ọ ya mẹ khiẹsẹ. Ọni ọ ri emhi kọ tuọ, emini e bu ọ ya mẹ khiẹsẹ.

⁷ Ogbogbo ọ ri irarigho ke rona abi o pfo ọli udu, ama ọ khi ri iwolo rona, ali o khi li abine khi oni a ri ekpabo re e riefe, irari khi Eshinegba ọ ma nono ọni ọ ri oghẹle e rue obọ-a.

⁸ Eshinegba ọ dobe ya ri ikhivose ni o dose oni a nono na e, ni a ro bhale ya e khi a mholi emhikpa gbeku ọ dose abi a nono ọli shi, ni a ro dobe ke riefe eminete khi eminete na egboese egheghe kpa.

⁹ Ezeze abi a li keke ọli shi Ebe-no-pfuase, ni ọọ, “O li okpokhe tuotuọ,

ọ somhi eni ẹa mhuẹ opfa,
ogbo ọa ya yele
igue-ngeli oyoli-a ghue
agboagbo.”*

¹⁰ Eshinegba ni ọ ri ukpamhi e na ogbo ro kọ, ọ gbo ri eminale na ogbokpa a le. Ọ ya gbo ri ikpamhi ni a ro ọ kọ ghi e, ọ gbo rewe ze, ọ rewe fu ni a mẹ khiẹsẹ. Ishigho ni onete ni u riefe na egbo o mo umomhi ne, ni u pfa le.†

¹¹ Ọ ya re e pfue odekhode ni a ke li okpokhe egheghe kpa, ni ebubu egbo e ke kphemhi na Eshinegba ini anye tsua isomhopfa eyẹ ghi we.

¹² Oni ugamhi ni a lina ri okpokhe oyee ona ga ena, ọa khi egbo eyi Eshinegba na pfa na tse o kpaghie obọ, egbo ebubu e ri itobo ona a kphemhi na Eshinegba.

¹³ Eri akanya ni a gbe na egbo eyi Eshinegba o ri ufumhi na Eshinegba, o rewe kueghie Eshinegba.

* 9:9 Li ze *Iwolo 112.9* † 9:10 Li ze *Aza 55.10*

Ona o rọkhasẹ khi eni e mie usomhi onete oyi iKirisiti suọ a khi, ni a ri oni usomhi gbe akanya, abi a li li okpokhẹ na wẹ ali ẹgbọ elese.

¹⁴ Inono ni e rọte ekelemhi udu mhọli na ẹ, e te ẹ sọ iromhi na ẹ, itobọ ikhivọsẹ ni Ẹshinegba ọ rẹ ẹ khivọsẹ na wẹ.

¹⁵ Awa ke kphẹmhi na Ẹshinegba shi isomhopfa oyọli ni unu ọa doḅẹ ngme pfo.

10

IPọlu ọ ri akanya aghiusomhi oyọli lo ẹgbọ esọ

¹ Eri a rọli shi khi eri mhia pfọ ini mhi la odalo oye ẹ nu ẹ ngme, ama ini mhi aa nu ẹ migha, mhi nu ẹ ẹ ngme ingmemhi ni e ze. Mena, mhi lema ẹ a ri esọ shi mhẹ eke, irari khi egbegbi iKirisiti lue ọ, ọna ipfomhẹ ali ikuegbe-a ọ khi.

² Ẹgbọ eghuo ẹ liẹ khi eri mhia ngeli abi ẹgbọ na agbọ ẹẹ li. Irarighọ mhi ya ri uruli ni o zẹ nu wẹ ngme emini mhi nu wẹ ya ngme ini mhi bhale. A kpekpe a khi yẹsẹ mhẹ lighọ ngeli deba ẹ.

³ Irari khi ini o ri riẹ khia khi elemhi agbọ anye la, anye ẹa ya khọli abi ẹgbọ na agbọ e liẹ khọli.

⁴ Irari khi itsua okhọli eyanye, ẹa khi eni áá mẹ alo gbugbugbu, ama obọ oyi Ẹshinegba e te bhale. E mhọli itoto ni e rọ doḅẹ ẹ guoghọ ekpabọ itoto oyi okphaghie-a. Anye ẹ guoghọ ekhako-a,

⁵ ali isamhi ighagha nya-a, ni ẹ khi ọzuode, ni e ti egbewẹ nga a dosẹ ilẹsẹ eyi Ẹshinegba. Anye ẹ mu isamhi ebe nya iko, anye rẹwẹ ẹ nyẹsẹ ukhomhi na iKirisiti.

⁶ Anye mu egbe ni anye rọ ya na umha-suesọ nya osoli ini isuesọ-negbe oye ẹ o gba se.

⁷ Ọa khi abi emhi o li ọdagbe a liẹ bino ọli? Ọnge ẹ ọkhoghwo ọ la ọ ni ọọ lu egbo li onayi iKirisiti, ọ gbo sa ingme egbo li bino, irari khi ọyi iKirisiti anye li khi abi loli ọli khi ọyi iKirisiti.

⁸ Omama ọa ya mu mhe shi ọ, ini mhi rie tonobobu udu dose ode shi afu ni Onomhuẹ ọ ro na mhe, mhi ro kpaghie ẹ obu, ni ọa khi oni a ro yese ẹ.

⁹ Mhi aa nono ni mhi li abine khi eri mhi ri ebe ni mhi keke ẹ nyamhise ẹ alo.

¹⁰ Irari khi eri egbo eghwo ẹ liẹ khi, ebe eyi iPolu e ma ko dose, ama ini ọ nu awa la ana ọ pfo-a, ingmemhi eyoli ẹa ke mu ame.

¹¹ A ze egbo eghoghọ lese khi emini anye keke shi ebe ini anye ẹa la agho, khi wewe anye gbolo ẹ rie, ini anye bhale migha.

¹² Anye ẹa gbudu ya ri egbe anye khokho eni ẹ titi egbe we. Irari khi eni eri e ri egbewe mhesẹ egbewe, ni e ri egbewe khokho egbewe, eyeghe e khi.

¹³ Ama anye ẹa ya tonobobu udu da ode, ama ashini Eshinẹgba ọ ri afu na anye ramhi anye ya tonobobu udu ramhi, ikhi akanya ni anye gbe ni o ramhi ẹ egbe.

¹⁴ Anye ẹa ya titi egbe anye dose ashini anye kha titi egbe anye ramhi, irari khi anye e mema rue usomhi onete oyi iKirisiti bhale ghi ẹ, ni a ga lese gboo.

¹⁵ Anye ẹa ya ri ikanya ni egboese e gbe ke tonobobu udu abine khi anye gbe we. Ochoghọ eri anye ri udu shi khi irudunga oyẹ ẹ o ya ke nga shi ọ, ni anye gbo dobe gbe akanya ni e fune iteva oyẹ ẹ, abi Eshinẹgba ọ mhesẹ ọli ni anye.

¹⁶ Ishegho ni anye dobe tsabo usomhi onete

obini eke oboese ni o kpẹ obọ na ẹ, ini anye khi tigbe ri ikanya ni a gbe oboese tono obọ udu.

¹⁷ Oni ọọ tono obọ udu, ọ ke ri emini Ọnọmhue ọ rieḽe tono obọ udu.*

¹⁸ Irari khi ọa khi ọni ọ ti egbe ọli nga egbo ẹẹ mie khi ọ ti, ama ọni Ọnọmhue ọ mie, ọ khi oni a mie.

11

IPọlu ali ighiusomhi na keẹ eyi egbhọli

¹ Mhi lema ẹ a kpẹkpẹ a rọshẹka ri egbe mie oyeghe oyemhe ukuku ọ tse!

² Ingme oyee o ma mu mhe egbe gba abi o li mu Eshinegba egbe, itobọ khi eri a li abi omueshi ni ọa me omose ghue, ni mhi she rọ nga na omose oghuo, ikhi iKirisiti.

³ Ulishi ọọ mu mhe ini a ya yese ẹ udu-a ali khi a ya tsua inono na tselele ni a mholi na iKirisiti pfia, ezeze abi enye ọ li ri ikpamhika eyọli di livu.*

⁴ Irari khi ini ogboese o bhale deba ẹ ya ri iJesu olese tse abọ ye ẹ, ni mhia rọ tsabọ ye ẹ ghue, okekha khi ayemhe olese ni o khi ọda shi oni a kpẹ mie, a ke mie, okekha usomhi onete olese ni o khi ọda shi oni a kpẹ mie a ke mie, eri a mema nyanya mie ọli.

⁵ Mhi aa sa khi mhi kpọ dọse ighiusomhi na keẹ ena aakemeghuae eye ẹ ni e ghọ mu ẹ eloe eghọ.

⁶ Ini o ri rie khia khi ungmehi ọa lolo bie shi mhe unu, mhia khi ọni ọa lese ebe. Anye she ri ona lo ẹ esọ gboo, odekhode.

⁷ Eri mhi ri ona lamhe ni mhi aa rọọ khi oki nga ẹ ike abi mhi rọ gue usomhi onete oyi Eshinegba ye

* 10:17 Li ze iJere 9.24 * 11:3 Li ze Igbae 3.1-5,13

ẹ? Ni mhi rọ ri egbe mhe tiemhie eke ni mhi rọ re ẹ fu?

⁸ Igbaa nya eyi eni e mie iJesu iKirisiti suọ elese ee fali mhe ota abi mhi rọ la iteva oyẹ ẹ gbe akanya. Mhi mie wẹ rọ zuse na ẹ.

⁹ Abi mhi rọ la ayẹ ẹ, mhi aa ri ingme ukpaghọ nase ẹ, inyoghwo awa ni e rọte iMasidonia bhale e tsua emhikpa ni mhi i nono ghi mhe. Abi o kpẹ li ookhokho, ni mhi aa kpẹ ri itsua na e tsua ighọ o kie ya li odalo.[†]

¹⁰ Ini igesikia oyi iKirisiti o da kie la mhe egbe ne, ọgbokhoghwo ọa la ọ ni ọ dobe ya khu mhe mhi khi ke lina tono obọ udu elemhi eke Akhaya.

¹¹ Ọa khi eri mhi aa nono ingme oyẹ, ini mhi ke da lie khi mhi aa nono ni mhi ri itsua na ẹ tsua. Eshinegba ọ lese khi mhi nono ingme oyẹ.

¹² Mhi ya kie ke rieṣe emini mhi kie kpẹ rieṣe. Eghẹghẹ agho, eni ẹẹ nono ni wewe e lie khi ikanya eyewe ali eyanye khi abeghuo e li, ni mhi rọli khi wẹ unu-a.

¹³ Emose eghoghọ, ighiusomhi na keẹ eyi egbhọli e khi, ni e ri ikanya ni ẹ gbe ẹ lono egbhọli, ni ẹẹ li egbo ikokoalo, ni e ri egbe wẹ shi khi ighiusomhi na keẹ eyi iKirisiti wewe e khi.

¹⁴ Ọa ke khi emini áá khokho, irari khi eri ọkphaghie ọ ri egbhọli mele aḡeni oyi ákpá a li egbo ikokoalo.

¹⁵ Irarigho, ọa khi emhi ọshabọ ini ighiusomhi eyoli, ẹẹ li ikokoalo ri egbewe mele ighiusomhi ni e migha shi ipfuase. Ikpukhokho, e ya me iso-ẹzo oyewe mie.

Osoli ni iPolu o me na iKirisiti

[†] 11:9 Li zẹ iFili 4.15-18

16 Mhi gbo ngme ọli, ọgbọkhoghwo ọ khi sa khi ọyẹghẹ mhi khi, ama ini u ke ligho sa, kie ligho mie mhe abi ọyẹghẹ, ni mhi me emhi ro ke neta omose.

17 Ama ọa khi emini Onomhuẹ ọ kha lie mhi ngme mhia ngme memena. Eri mhi ga ngme abi ọyẹghẹ elemhi ingme ineta omose ona.

18 Aborokhia khi egboese e ri emini e rieḽe eẹ neta omose egho, mhi ya li lana ligho.

19 Ilesingme dose oyee o ze ni a ro ri oghelẹ mie eyeghe shi iteva oyee ena!

20 Egbo ni eẹ mu e ighumha, ni e ri ikpamhika do e ighiatọ, ni e reẹ le emhi, ni e ri ukpeloe e gbe e e gbo pfi ima shi e alo, wewe aa mie.

21 Omama o khi, ni mhi ro lie khi eri anye pfo alo-a, ni anye a ro lina ngeli deba e.

O kha khia khi onete o khi ni eni ighiusomhi eyi egbhọli egho e ro ke neta omose shi emhi afue ni eẹ rieḽe deba e, mhi ya li nu we la ana neta omose. Ama a roli shi udu khi ọgbọ ni ọọ neta omose shi angeli oghoghọ, khi ọoyeghe ọ khi.

22 Ghe khe, e khe khi Iburu wewe e khi, Iburu mhi li khi, eẹ khi iZireni wewe e khi, iZireni mhi li khi. Imimi Aburaamu ni e khi, lolu mhi li khi.

23 Ighiusomhi eyi iKirisiti eẹ khi wewe e khi? Mhi la ana ya li ọyẹghẹ! Mhi ga ti dose we e! Mhi ga gbe akanya dose we. Mhi la owa ighumha itingme ni e bu ne, iti-ingme ni a gbe mhe itali e bu dose eyewe. Iti-ingme ni eghuli o kha gbe mhe e bu ne.‡

24 Agbhagbhamhi ishe egbo iJu e gbe mhe itali oghuo ọa la egbhueva.§

‡ 11:23 Li ze Ika 16.23 § 11:24 Li ze iDeut 25.3

²⁵ Itesẹ ẹgbọ iRomu e gbe mhe ikpokpo, a tono mhe echẹ utoghuo. Itesẹ ọkọ okẹ oniẹmhi ni mhi lo e kulue, ogbeleghuo ali eliyose nya mhi la ukhomhi okẹ oniẹmhi, ni o tsua mhe gase, ni mhia me abi mhi li kia.*

²⁶ Iti ingmi-ingme mhi ye asha, ni mhi kha ri egbe na okẹ oniẹmhi ali ighiatọ gbe-a, mhi gbo la okheṇa oyi ẹgbọ iJu eyemhe, ali iJeta. Mhi li la egbegbi okheṇa elemhi ifui apfe, mhi la okheṇa ọdagbe ifufu, mhi la okheṇa ukhomhi okẹ oniẹmhi, mhi gbo la okheṇa oyi ẹgbọ eghuo, ni e li abi eni e mie Onomhue suo.†

²⁷ Eghẹghe kpa mhi rọ la irosheka ali akanya agbeghua, mhia me olesẹ lesẹ ele-iyose eni e bu, okiamhi ali okiamẹ o gbe mhe. Eminale eyemhe e pfo mhe isheghuo, isheghuo ulili o gbe mhe, mhi aa me itsua sọ.

²⁸ Ini a ri obọ ri egho shi eke, ogbelekpa usamhi ni mhi sa shi ingme oyi igbaa nya eyi eni e mie iJesu iKirisiti suo o rọ nase mhe.

²⁹ Oghuo o famhi losẹ ni ọa li pfi ọlọsemhe na mhe? Abi khi ọgbokhoghuo ọ lamhe olamhe ni ọa ri egbe lala mhe?

³⁰ Ini mhi rie neta omose, emini e ri ọlọsemhe oyemhe ya khasẹ mhi rọ ya neta omose.

³¹ Eshinegba ita Onomhue iJesu ọ lesẹ khi ọa khi ẹgbhọli mhia lo. Ikhivose khi eva oyọli agboagbo

³² Abi mhi rọ la ẹoli iDamasikosi, eri igovunọ ni o gbe akanya deba oghie Arẹtasi ọ ri idogeli kpe khe mhe ode unuekpe ni a te lo oni ẹoli, ni e ba gba mhe mu.

* **11:25** Li zẹ *Ika* 16.22; 14.19 † **11:26** Li zẹ *Ika* 9.23; 14.15

³³ Ama eri oḡbọ rue mḡe pfilo ugi rọte okele ni o la ugbe ni a khi gasẹ oni ẹoli bẹna tiemhi, ni mhi rọ mẹ asha na vu.‡

12

Irokhase ni iPolu o mẹ

¹ Mhi ya kie ke neta oḡṣe, ama, mhi lẹṣe khi ọa mḡoli eleli ni o rọ o bhale. Irarigho ingme imekẹ ali irokhase ni Onomhufe o rọ na mḡe mhi ke ya ke ngme nga memena.

² Mhi lẹṣe oḡṣe oḡhuo ni o la elemhi iKirisiti ni a rue je idane agbhagbhamhi onuzi-eṣe, oonokpe-igbene. Ini elemhi idiegbe o la o, ini ọa khi elemhi idiegbe o, mhia lẹṣe. Ama Eshinegba o lẹṣe.

³ Abi mhi ngme, mhiẹ khi Eshinegba tṣe o lẹṣe ini elemhi idiegbe o la, ini ọa la elemhi idiegbe.

⁴ Eri a rue ọli eke-a zai, ya nga Apfe oyi Eshinegba na iloghie. O suọ emini ẹa zẹ ya guele, ni aa ya lama shi a gbudu ngme unu le.

⁵ Oni oḡṣe oḡḡo mhi rọ ya neta oḡṣe. Ama mhia ya ri egbemḡe neta oḡṣe, ṣe ni umha mḡue ekpabọ oyemḡe.

⁶ Ini mhi ri riẹ neta oḡṣe, mhia ya riẹṣe ingme oyegḡe, itobọ khi igesikia mhia ngme tṣe. Mhi ya rọshẹka ini mhi khi ngme da ode. Eḡḡeḡe aḡḡo ọḡḡe ọkhoghuo ọa ya timḡe nga dọṣe abi a kha timḡe nga ramhi, rọte emini a mḡe khi mhi riẹṣe ali emini a suọ khi mhi ngme.

⁷ Eri a ri emini o li abi ugba ni o ya ke nase mḡe shi mḡe egbe ni o khi aghiusomhi oyi okphaghie, ini mhi khi vuse ike dọṣe shi irokhase ebubu ni mhi mḡe.

‡ 11:33 Li zẹ Ika 9.23-25

⁸ Itese mhi lema Eshinegba o mie mhe oni emhi anasemhe ona pfi-a.

⁹ Ama emini o ro so mhe o khi, “Ekpabo eyemhe o she bu e, irari khi ini o lose, loli ekpabo eyemhe e ro me asha ri egbe e khasa.” Irarigho mhi ro ri oghela ri olosemhe oyemhe ya neta omose, ni ekpabo eyi iKirisiti e me asha remhe gbe akanya.

¹⁰ Ini mhi mhue olosemhe, ali ni a ro tsue mhe, ali ni mhi ro la umhame ali ni a ro mu okholi vule shi mhe o, ali ni mhi ro mholi iyese-udu-a, o kha da khi itobo oyi iKirisiti, eri o ri egbe e mu mhe. Irari khi ini o lose mhe, loli mhi ro mholi itoto.

Ingme oyi egbo iKoriti o mu iPolu egbe

¹¹ Eri mhi chi ooyeghe-a, ama ee a yese mhe e chi oli-a. Ee a kha ke titi mhe. Ini mhi aa ririe khi emhi khoghua, mhia mhue emhikhoghua ni mhi te kpo dose eni a lui, “Ighiusomhi na kee ena aakeme ghue.”

¹² Elemhi iregbemie osoli, mhi ro la iteva oyee gbe riele olele onyaloa ali oshabo ni o ro khasa khi aghiusomhi na kee oyi iKirisiti mhi khi.

¹³ Eri ikhivose ni igbaa nya eyi eni e mie iJesu iKirisiti suo elese e me mie o de e unu-a? Abi mhi aa li ri ingme ikpaghiobo ukpagho nase e lo? A kpekpe, a ro topfa mhe shi o.

¹⁴ Utonuzese na ni mhi ro mu egbe ni mhi ro bhale ya bino e. Mhi aa ya mhila e emhi khoghua. Ee oyee mhia nono, o a khi ukpagho oyee. O a kpe khi eniye e ri emhi na eni e bia we e le, ama eni e bia eniye e ri emhi na we e le.

¹⁵ Irarigho, mhi ro ya ri oghela ri ukpagho ni mhi mholi nya ali mhemhe nya na e, ro kpaghie e obo.

Inono onikeke a ya mhõli deba mhẽ ini mhi mhõli inono oniemhi na ẽ?

¹⁶ A lama shi ọ khi mhi aa khi itsua na ẽ ni aa tsua. Ama ẹgbọ eghuo e ya liẹ khi ikpamhika mhi rọ ri ẹgbhọli di ẽ mu.

¹⁷ Eri mhi ri ẹgbọ ni mhi ghie ghi ẽ mu ẽ ma eke?

¹⁸ Eri mhi lema iTatọsi o ke lẹ, mhiẹ inyoghuo awa ọnọkpọle ọ kphase ọli. Eri a ya liẹ khi eri iTatọsi ọ mu ẽ ma eke? Ọa fẹ lighọ. Abi khi aa lẹsẹ khi usamhi oghuo mhemhẹ ali lọli anye mhõli shi udu ni anye rọ riẹlẹ emini mhemhẹ ali lọli anye ga riẹlẹ?

¹⁹ Otse eri a dabi khi eri anye kie kpẹ rọshẹka ke khe egbe anye shi eke odalo oyẹ ẹ. Ọa khi ighọ. Ama abi iKirisiti ọ nono ni anye li ngme, anye li odalo oyi Eshinegba. Emọle, eri anye riẹlẹ emini anye riẹlẹ nya rọ kpaghie ẹ obọ.

²⁰ Egbe limhẹ khi ini mhi ramhi aghọ khi mhia ya bhale ya mẹ ẹ shi abi mhia nono ni a li, ali khi aa ya mẹ mhẹ abi a nono ni mhi li. Ulishi ọọ mu mhẹ khi mhi ya bhale ya ẹ shi uwola ali ubọgbọ, ali udu ni ọọ to, ali ukpẹ, ali ikemhi ikui-iku, ali iyese egbe eva-a, ali ineta, ali itipfuabọ-nga, ali ozughu iteva oyẹẹ.

²¹ Egbe limhẹ khi ini mhi ke bhale, khi Eshinegba ọ ya ri omama mu mhẹ odalo oyẹẹ. Mhi ya viẹ na ebubu ẹ ni ẹa kie rọte agbọ olamhẹ oyẹwẹ mupfi lasele. Ni a kie la angeli efiala, ikhi usamhi irumheba, ali olamhẹ ighuẹ imumu.

13

Itse-agua ali otse enekpukhokho

¹ Utonuzese na ni mhia bhale ya bino ẹ. Abi Ebe-no-pfuase o ngme ni ọọ, “Ọtsele eva, okekhi ese, a rọ ọ mu ma ingme, ni a rọ sọ ẹzọ.”*

² Mhi kpẹ tse agua yẹ ẹ, ẹẹ ni a kpẹ lamhẹ olamhẹ, ali ẹgboese eni e kpọle nya. Mhi kpẹ ngme ọli ibhale onuzi-eva oyemhẹ. Memena, mhi gbo ngme ọli abi mhi la oboese, mhi tse agua khi ini mhi gbo bhale khi mhi aa ya zẹ wẹ obọ khi mhi aa na wẹ osoli.

³ Onana o ya rọkhasẹ ẹ khi iKirisiti mhi ngme ẹ na. Ini ọ sẹsẹ ẹ ingme se, a rọ ya lẹsẹ khi ọ mholi ekpabọ iteva oyẹẹ.

⁴ Ini o ri riẹ khia khi ọa mhuẹ itoto abi a rọ tali ma apfida gbe-a, ekpabọ oyi Ẹshinegba ọ rọ a la agbọ. Eri awa aa li mhuẹ itoto abi iKirisiti. Ama a ya mẹ ọli khi anye ya ri ekpabọ oyi Ẹshinegba la agbọ, ẹzẹzẹ abi iJesu ọ li, ni anye rọ ga ẹ.

⁵ A mhẹsẹ egbe ẹ bie bino ni a mẹ ini a kie la elemhi irudunga oyẹ ẹ. Ini a mhẹsẹ egbe ẹ bino ni a rọ mẹ khi iJesu iKirisiti ọa la agbọ oyẹẹ, a lẹsẹ khi a she de oni imhẹsẹbino.

⁶ Mhi lẹsẹ khi a ya mẹ ọli mẹ khi anye ẹa de oni imhẹsẹbino.

⁷ Anye lema Ẹshinegba, a khi riẹlẹ dọ-a. Ona ọa khi ni anye rọ rọkhasẹ khi anye she mẹ emini anye ẹ nono mu mhuẹ, ama ni o rẹ ẹ ke riẹlẹ emini e gbe akanya ini anye riẹ li abi eni de.

⁸ Irari khi anye ẹa ya riẹlẹ emini o mu okholi vule shi igesikia ọ, ama emini o ya mu igesikia mhuẹ anye ya riẹlẹ.

⁹ Egbe ma mu anye, ini o lọsẹ anye ni ẹẹ a rọ

* 13:1 Li zẹ iDeut 17.6; 19.15

mholi itoto. Igho anye gbo lie so iromhi Eshinegba o re e ke ngeli shi egheghe, abi o nono ni a li ke ngeli.

¹⁰ Loli o ze khi mhia kekere ebe ona abi mhia ro nu e la oobo ena. Igho lo, ini mhi khi roli ze mu e, ini mhi bhale deba e. Irari khi eri mhia nono ni mhi ri afu ni Onomhue o ro na mhe gbe akanya, ni mhi ro kpaghie e obo, ni o a khi ni mhi ro bighi e de.

¹¹ Ni mhi ro gbe oli ukhomhi inyoghuo-mhe, Okhila! A mu udu oye e pfi, a suo olema oyemhe, a lama shi egbe e o, a ri opfomhe nu egbe ke la. Eghoghe agho ni Eshinegba na inono ali opfomhe o nu e la.

¹² A ke tse egbe egbegbi otse, a ghele mu egbe.

¹³ Egb o eyi Eshinegba nya ee tse e.

¹⁴ Okhale oyi iJesu iKirisiti Onomhue, ali inono oyi Eshinegba, ali iregbemu onayi Ayemhe-nopfuase, e ka nu ee nya la.

Ebe-No-Pfuase Ishobo Onogbo
New Testament in Ivbie North-Okpela-Arhe
(NI:atg:Ivbie North-Okpela-Arhe)

copyright © 2012 Wycliffe Bible Translators, Inc.

Language: Ivbie North-Okpela-Arhe

Translation by: Wycliffe Bible Translators, Inc.

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789194797

The New Testament

in Ivbie North-Okpela-Arhe

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 19 Dec 2025 from source files
dated 29 Jan 2022

03be06b0-68fd-500b-b9a9-6bca4b63979a